

## ATODLEN 1

Rheoliadau 11 i 15

Busnesau a gwasanaethau y mae eu mangreoedd yn ddarostyngedig i gyfyngiadau neu i'w cau

## RHAN 1

Busnesau neu wasanaethau y mae rhaid cau eu mangreoedd

1. Unrhyw fusnes sy'n gwerthu nwyddau neu wasanaethau ar gyfer eu gwerthu neu eu hurio mewn siop, gan gynnwys—
  - (a) siopau nwyddau i'r cartref;
  - (b) salonau ewinedd a harddwch;
  - (c) sefydliadau sy'n darparu gwasanaethau lliw haul, gwasanaethau tylino, tyllu'r corff, tatŵio, electrolysis neu aciwbigo;
  - (d) tai arwerthiant;
  - (e) delwriaethau ceir;
  - (f) marchnadoedd;
  - (g) siopau betio;
  - (h) salonau gwallt a barbwyr;
  - (i) canolfannau garddio a meithrinfeydd planhigion.
2. Canolfannau siopa ac arcedau siopa.
3. Sinemâu.
4. Theatrau.
5. Clybiau nos, disgos, neuaddau dawnsio neu leoliadau eraill lle y darperir cerddoriaeth fyw neu wedi ei recordio i aelodau'r cyhoedd neu aelodau'r lleoliad ddawnsio.
6. Lleoliadau adloniant rhywiol (o fewn yr ystyr a roddir i "sexual entertainment venue" gan baragraff 2A o Atodlen 3 i Ddeddf Llywodraeth Leol (Darpariaethau Amrywiol) 1982(1)).
7. Neuaddau bingo.
8. Neuaddau cyngerdd.
9. Casinos.
10. Canolfannau sglefrio.
11. Pyllau nofio.
12. Canolfannau hamdden a chyfleusterau hamdden gan gynnwys stiwdios ffitrwydd o dan do, campfeydd a sbaon.
13. Cyrtiau chwaraeon, parciau sglefrio, lawntiau bowlio, cyrsiau golff a meysydd neu leiniau chwaraeon amgaeedig (boed yn yr awyr agored neu o dan do).
14. Aliau bowlio, arcedau diddanu a manau chwarae o dan do.
15. Amgueddfeydd, orielau a gwasanaethau archifau.
16. Ffeiriau pleser, parciau diddanu a pharciau thema.

---

(1) Mewnosodwyd paragraff 2A o Atodlen 3 gan adran 27(3) o [Ddeddf Plismona a Throsedd 2009](#) (p. 26).

17. Atyniadau i ymwelwyr a busnesau gwyliau, gweithgareddau hamdden neu ddigwyddiadau.
18. Canolfannau ailgylchu.
19. Llyfrgelloedd.
20. Asiantau eiddo neu asiantau gosod eiddo, swyddfeydd gwerthiant datblygwyr a chartrefi arddangos.
21. Lleoliadau ar gyfer digwyddiadau neu gynadleddau (gan gynnwys lleoliadau ar gyfer priodasau heblaw am fannau addoli a swyddfeydd cofrestru).

## RHAN 2

Busnesau neu wasanaethau y mae rhaid cau eu mangroedd ond y caniateir mynediad cyfyngedig iddynt

### PENNOD 1

Mangroedd sy'n gwerthu bwyd a diod i'w bwyta ac i'w hyfed yn y fangre

22. Bwytai, gan gynnwys bwytai ac ystafelloedd bwyta mewn clybiau aelodau ac ym mangroedd busnesau a restrir ym Mhennod 2 o'r Rhan hon.
23. Caffis, gan gynnwys ffreuturau yn y gweithle a chaffis ym mangroedd busnesau a restrir ym Mhennod 2 o'r Rhan hon.
24. Bariau, gan gynnwys bariau mewn clybiau aelodau ac ym mangroedd busnesau a restrir ym Mhennod 2 o'r Rhan hon.
25. Tafarndai.

### PENNOD 2

Gwestai a llety gwyliau

26. Safleoedd gwyliau.
27. Safleoedd gwerysyla.
28. Gwestai a llety gwely a brecwast.
29. Llety gwyliau arall (gan gynnwys fflatiau gwyliau, hostelau a thai byrddio).

### PENNOD 3

Eraill

30. Mannau addoli.
31. Canolfannau cymunedol.
32. Amlogfeydd.

## RHAN 3

Busnesau a gwasanaethau y caniateir i'w mangroedd fod ar agor

33. Manwerthwyr bwyd, gan gynnwys marchnadoedd bwyd, archfarchnadoedd, siopau cyfleustra, siopau cornel a sefydliadau sy'n gwerthu bwyd neu ddiod i'w fwyta neu i'w hyfed oddi

ar y fangre (gan gynnwys mangreoedd sydd wedi eu hawdurdodi ar gyfer gwerthu neu gyflenwi alcohol i'w yfed oddi ar y fangre).

34. Caffis a ffreuturau mewn ysbyty, cartref gofal, ysgol neu mewn llety a ddarperir ar gyfer myfyrwyr.

35. Ffreuturau mewn carchar neu sefydliad y bwriedir iddo gael ei ddefnyddio at ddibenion y llynges, y fyddin neu'r llu awyr neu at ddibenion Adran yr Ysgrifennydd Gwladol sy'n gyfrifol am amddiffyn.

36. Llyfrgelloedd ysbytai a llyfrgelloedd mewn sefydliadau addysgol.

37. Siopau papurau newydd.

38. Siopau cyflenwadau adeiladu ac offer.

39. Fferyllfeydd (yn cynnwys fferyllfeydd nad ydynt yn darparu cyffuriau ar bresgripsiwn) a siopau cemist.

40. Siopau beiciau.

41. Gorsafoedd petrol.

42. Gwasanaethau trwsio ceir ac MOT.

43. Busnesau tacsï neu logi cerbydau.

44. Banciau, cymdeithasau adeiladu, undebau credyd, darparwyr benthyciadau tymor byr, clybiau cynilo, peiriannau arian parod ac ymgymeriadau sydd, o ran eu busnes, yn gweithredu swyddfeydd cyfnewid arian cyfred, yn trawsyrru arian (neu unrhyw gynrychiolaeth o arian) drwy unrhyw ddull neu sieciau arian parod sydd wedi eu gwneud yn daladwy i gwsmeriaid.

45. Swyddfeydd post.

46. Golchdai a siopau glanhau dillad.

47. Gwasanaethau deintyddol, optegwyr, gwasanaethau awdioleg, trin traed, ceiropractyddion, osteopathiaid a gwasanaethau meddygol neu iechyd eraill, gan gynnwys gwasanaethau sy'n ymwneud ag iechyd meddwl.

48. Milfeddygon a siopau anifeiliaid anwes.

49. Siopau cyflenwadau amaethyddol neu ddyframaethu.

50. Marchnadoedd neu arwerthiannau da byw.

51. Trefnwyr angladdau.

## RHAN 4

### Dehongli

52.—(1) At ddibenion yr Atodlen hon, ystyr “safle gwyliau” yw unrhyw dir yng Nghymru lle y gosodir cartref symudol neu garafán at ddibenion byw gan bobl (gan gynnwys unrhyw dir yng Nghymru a ddefnyddir ar y cyd â'r tir hwnnw), y mae'r caniatâd cynllunio perthnasol neu'r drwydded safle ar gyfer y tir mewn cysylltiad ag ef—

(a) wedi ei fynegi i'w roi neu wedi ei mynegi i'w rhoi at ddefnydd gwyliau yn unig, neu

(b) yn ei gwneud yn ofynnol bod adegau o'r flwyddyn pan na chaniateir gosod unrhyw gartref symudol neu garafán ar y safle i bobl fyw ynddo neu ynddi.

**Statws** This is the original version (as it was originally made).

(2) At ddibenion penderfynu a yw safle yn safle gwyliau ai peidio, mae unrhyw ddarpariaeth yn y caniatâd cynllunio perthnasol neu yn y drwydded safle sy'n caniatáu gosod cartref symudol ar y tir i bobl fyw ynddo drwy gydol y flwyddyn i'w hanwybyddu os yw wedi ei hawdurdodi i'r canlynol feddiannu'r cartref symudol—

- (a) y person sy'n berchennog ar y safle, neu
- (b) person sydd wedi ei gyflogi gan y person hwnnw ond nad yw'n meddiannu'r cartref symudol o dan gytundeb y mae Rhan 4 o Ddeddf Cartrefi Symudol (Cymru) 2013<sup>(2)</sup> yn gymwys iddo.

---

(2) 2013 dccc 6, fel y'i diwygiwyd gan Ddeddf Tai (Cymru) 2014 (dccc 7).